



**Il Poeta**

**VITO LUMIA**

nato a Mazara del Vallo il 14/2/1940

residente a TRAPANI

Via Fedra n. 4

## P'A SAGRA D'U MULUNI DI PACECU

*Ci fu a Pacecu 'a sagra d'u muluni  
genti 'mmitata ccu cart'appizzati  
tutti li strati chini di strisciuni  
càlia, simènza, lampad'addumati.  
Aria di festa c'era 'gnuni 'gnuni  
li Pacicòti tutti 'ntraficati  
lassàru 'ncasa fàuci e zappuni,  
p'un jornu fòru tutti littirati.*

*Un pùlpitu 'nta chiazza preparararu  
e ddocu a unu a unu 'i Puitùna  
tanti virsuzzi beddi ricitaru  
'u publicu ascutàu sutta la luna.  
A cu nun lu sapìa cci lu 'nzignaru  
comu si fa a mèttiri muluna  
cu tanta maistrà si sbuttunaru  
senza truvàri ruppa o truppìcuna.*

*C'aricchi chini chini di 'sti vuci  
li Pacicòti ddà si scuppulàru.  
qualcunu nàutr'antìcchia si cunnuci  
lu restu si nni torna a lu pagghiàru.  
Finù la festa, s'astutàru 'i luci,  
chiddu ca li Pueti siminaru  
speriamu chi rènni e chi produci . . .  
mannò pistàru acqua 'nto murtàru !*

## LA ME MUSA

Ogni pueta havi la so musa  
cu l'havi sgangulata veru laria  
cu l'havi turtulidda o vaddarusa  
cu l'havi svariugnata o strafalaria.

'Sta musa mia comu voli Diu  
è propriu 'na fimmina di lettu  
sugnu cuntentu e tuttu m'arricriù  
quannu s'annàca e cci talìu lu pettu.

E propriu pirchè è bedda pitturusa  
còmmiru cci vaju quannu m'allatta,  
chi piacìri quannu fa li fusa  
mi pari propriu megghiu di 'na atta.

Quantu mi voli bbeni nun vi dicu  
p'idda sugnu 'u figghiu prediletu  
e certu pirchè sugnu ancora nicu  
la notti scuru ddà 'nta lu so lettu.

Sapissivu li cunzigghi ca mi duna  
e si nun l'ascùtu idda si 'ncueta,  
mi dici; - nun allattu picuruna,  
lu sangu ju lu dugnu a lu pueta.

E tu ca si pueta pi daveru  
li versi to' nun mèttiri di latu  
mànnali 'ngiru pi lu munnu 'nteru  
ju pi chissu t'hau nutricatu.

Chidda di lu pueta è 'na missione  
di li to' versi tu nun si patruni  
cu è ca ti duna tanta ispirazioni  
quannu ddu pettu sgugghiu lu buttuni?

Cu tutti 'sti carizzi e 'sti vasuna  
lu sacciu zoccu voli 'a musa mia  
pi chissu grapu tutti li casciana  
e mettu in libbertà 'sta puisìa!

## LA PUISIA

*Ddu cori nèsci propriu cu fururi  
comu lu sangu nèsci di li vini  
si la sazzati havi lu sapuri  
di nètтарu pigghiātu di li tini.  
Idda 'mbriaca tutti 'i vivituri  
va 'ngiru pi lu munnu e si fa onuri.*

*Quannu 'ncontra un'alma sularina  
ca si la leggi cu amuri e sintimentu  
di lagrimi cci ìnchi la sacchina  
pirchè porta cunzigghiu e 'mparamentu.  
E nun cci pònnu manetti e catìni  
tutti li ùtti già nni sunnu chini.*

*Ju quannu mannu 'sti virsuzzi beddi  
'mmucca a lu lupu, a la stranìa,  
chiaru lu dicu ca m'arrizza a peddi  
pinzannu a li periculi dda vìa.  
Cu tantu amuri cci dugnu cunzigghi  
comu lu patri ca parla cu li figghi.*

*Cu l'ali bianchi comu palummeddi  
'sti versi mei vulannu in libbertà  
vannu a truvare cori picciutteddi  
e cori vecchi ca nun hannu età.  
S'ju fussi dutturi, ogni matina,  
la dassi a tutti comu miricina.*

*Pi bberu la puisìa duna vita,  
grapi l'alma e lu cori a la spiranza  
e lu veru pueta a tutti 'mmita  
a ìnchisi lu cori e puru 'a panza.  
Ju 'sta bedda puisìa tantu amata  
senza dinari, la dugnu rigalata.*

*Annunca, cu nn'havi gran disù  
vinitimi a truvare dunni sugnu  
e vi lu giuru pi lu veru Diu  
'na bedda valanzata vi nni dugnu.  
Facitivilla 'na bedda abbuffata  
tantu unn'è la me, ju l'àppi data.*

## SUGNU SCANNALIATU

*Ammàtula mi dici ca sugnu stravacanti  
c'un tegnu cchiù 'nto cori 'u duci meli  
c'un criu cchiù nè Omini nè Santi  
ca sugnu fattu amaru cchiù ddu feli.  
Ju sugnu comu sugnu: scannaliatu,  
talìu lu munnu e dicu: chi piccatu !*

*Ogni parola tàgghia comu fussi àscia,  
si parlu o scivu mi sbacantu tuttu  
e s'un casuni mi pigghia pi bardàscia  
ju lu talìu, ascùtu e mi nni futtu.  
Ju mi nni futtu propriu pi daveru  
tantu 'stu munnu è propriu un cimiteru!*

*E' un cimiteru pircbì murìu l'onuri  
e l'amicizia, un jornu bedda e forti,  
murìu, nun c'è cchiù lu veru amuri,  
'sti beddi sentimenti sunnu morti.  
Dunca, chi resta ancora d'avanteri ?  
Un populu di morti misi 'mperi !*

*Li usi e li costumi ddu passatu  
li cosi antichi comu la saggizza  
fineru, 'stu munnu ju lu vù trasfurmatu  
mi pari un càntaru chinu di munnizza.  
Dunn'è la bedda puisìa ? Puru finìu,  
certi pueti d'ora: chi schifìu !*

*E puru certi critici 'gnuranti  
'sti novi scribi, si criditi a mmia,  
un passuluni lu scancianu pi Danti  
e certi fissariù pi puisìa . . . .  
Pi chissu tanti voti quannu scrivu  
di certi tinnirizzi sugnu privu !*

## MI SENTU SULU

*'Nta 'stu disertu di malincunìa  
staiu murenmu propriu assicittatu  
mi vèppi tutta l'acqua chi tinìa  
e ora sugnu ccà mezz'accarpatu.*

*Chi vali stari 'menzu a 'sti pirsuni?  
cu mi talìa? Cu mi duna ciatu?  
Vaju girannu comu un passuluni  
sulu suliddu, senza nuddu allatu.*

*Si c'è 'ncapu 'sta terra addinucchiata  
un'alma sularina comu a mmia  
pirchè nun nèsci di dunn'è ammucciata  
pi darimi tanticchia 'i cumpagnìa?*

*Nun sugnu ursu, cani e mancu mulu  
si mi nni staiu accussì appartatu,  
chissa è la virità: mi sentu sulu  
'ncapu 'stu munnu tantu populatu!*

## CANTU D'ACEDDU

*Ju la 'ntisi 'na sira di jinnaru  
vinà di 'menzu l'arvuli d'olivi  
cra la vuci ddi un'aceddu raru  
cantava pi li morti e pi li vivi.*

*Cantava l'acidduzzu sulitariu  
dava a 'stu munnu l'urtima nutizia  
cci ricordava spissu lu calvariu  
e cc'ammuttava versu la giustizia.*

*Cantannu priava lu Signuri  
veni ccà 'nterra ascùta a mmia  
ccà c'è bisognu di lu to' duluri.*

*Veni ccà 'nterra, grida la to' vuci  
l'Omini si scurdarunu ddi tìa  
veni a mòriri nautra vota 'ncruci !*

## NATALI

*A mumentu veni la festa di natali  
tutti li cosi cancianu culuri  
li picciriddi pensanu a' rigali  
mentri li granni scordanu 'i duluri.*

*Pa festa si preparanu l'armali  
pinzannu a li ricchi mangiaturi  
e l'angiuliddi svintuliannu l'ali  
preparanu la strata a lu Signuri.*

*Dintra ogni casa c'è un'artareddu  
cu a stidda, li Re Magi e lu pasturi  
ca vannu a visitari 'u bambineddu.*

*La genti quannu viri 'u Salvaturi  
'nto menzu di lu sceccu e lu viteddu  
si scorda l'odiu jinchenusi d'amuri.*



## DISIÙ DI MAZARA

*Cu campa luntanu di lu so paisi  
sulu chissi pònnu capiri 'stu duluri  
li suffirenze di 'stu Mazarisi  
ca mentri cbianci parturisci amuri.*

*Ju penzu a li mei anni mali spisi  
e passu li me jorna e li me uri  
ristannu straniu pi 'sti Trapanisi  
pi curpa d'un distinu trariturì.*

*Di la me terra sentu lu disìu  
e pi nun fari sempì 'u ruculusu  
spissu volutamenti mi stravìu.*

*Ma quannu tornu 'nta lu me pirtusu  
ju jiettu lu me cori pi camù  
'ntall'acqua di lu Mazzaru fitusu!*

## FRATILLANZA

*Chidda di li pueti è 'na famiggia  
dunni la matri si chiama puisìa  
semu attaccati pi la stissa brigghia  
l'arti duna lu sènnu e la valìa.*

*Ccà ogni cumpunenti s'assimiggia  
comu fratuzzi, nuddu si 'mmirìa,  
anzi a lu bisognu si cunzigghia  
pi nun sbagghiari passu, metru e vìa.*

*Dunca, corpu di sangu chi vi pigghia,  
finitila di fari li 'mmiriusi,  
mannò succeri propriu un parapigghia.*

*Si nun faciti 'i serpi vilinusi  
e lu giuriziu vostru s'arruspigghia  
l'arti vi grapi 'sti ciriveddi chiusi!*

## TRI CUSUZZI PI MARIA

*Un pizzuddu di celu ju arrubbavi  
'nzemi a un pugnu di lucenti stiddi  
li misi dintra un saccu e l'attaccavi  
c'un lazzu fattu cu li mei capiddi.*

*'Na nuvula passava e l'attrappavi  
pinzannu quantu voti chista e chiddi  
cu l'occhi sbarrachiati tu taliavi  
spinnannu comu fannu 'i picciriddi.*

*E quannu 'sti cusuzzi ti purtavi:  
" amuri ti ringraziu " mi dicisti,  
ma era tuttu veru o mi sunnavi ?*

*'Nto pettu tutti cosi ti strincisti  
e mentri ti vasavu e mi vasavi,  
amuri, comu cira ti sciugghisti !*

## U N ' U M M I R A

*C'è un'ummira ca veni appress'a mmia  
e ju nun sacciu cchiù zoccu pinzari  
nun havi occhi eppuru mi talìa  
nun havi vucca e mi voli vasari.*

*Ju nun capisciu s'è pi simpatìa  
o si lu fa pi farimi scantari,  
nun è lu fruttu di la me fuddia  
certu è un'armuzza ca voli parlari.*

*Propriu stanotti pi essiri sinceru  
la vitti a li peri ddu me lettu,  
'ntisi lu chiantu e nun mi parsi veru:*

*Maria mi stava propriu a lu cuspettu,  
mi dissi: "nun veni cchiù o cimiteru?  
Ju sugnu sempi ddà, sempi t'aspettu".*

## A M A R I Z Z A

*Ma comu pozzu essiri cuntentu ?  
supra 'sta terra pi nenti si spara,  
mi votu a dritta e manca e zoccu sentu ?  
Morti ammazzati a corpa di lupara !*

*Ogni matina agghiorna un fallimentu  
e nuddu sapi zoccu cci pripara  
'sta foddi cursa versu l'aumentu,  
ognunu a proprii spisi si lu 'mpara.*

*Megghiu 'na vota quannu si mangiava  
pani e cipudda e pasta ogni simana,  
si travagghiava e nuddu si vaviava.*

*C'era rispettu pi la vita umana,  
si scia di 'ncasa e 'ncasa si turnava  
. . . cu morsi ? Pi cu' sona 'sta campana ?*

## STASIRA

*Stasira sugnu ccà pi sbuttaniari  
certi pueti e critici 'ngnuranti  
ca vannu pi lu munnu a puitari  
a chiddi com'a iddi: stravacanti.*

*Parlu di chiddi ca sannu 'nsosizzari  
quattru paroli e li chiamanu canti  
cu quali facci li vannu a ricitari?  
Comu si cci presentanu davanti?*

*Ju quannu viù tutti st'ambulanti  
chi fannu puisìa ca pari fumu  
li fulminassi propriu sull'istanti.*

*E qualchi vota veru mi cunzumu  
'sti ciarlatani sunnu tantu birbanti  
quantu 'u sirpenti ca cughèu lu pumu!*

## VISITANNU MAZARA

*E finalmente àppi 'sta furtuna  
di riturnari 'ntra li mei cuntrati  
cu cori allegru e l'alma cuntintuna  
Jivi passiannu 'nzemi a li me frati.*

*Ma 'u me paisi fattu di cantuna  
cchiù nun truvai, vitti sulu 'i strati  
cc'eranu tanti e tanti palazzuna  
arvuli sicchi e muri sdirrupati.*

*Ju nun vi cuntù fàusi balluna  
quannu vi dicu ca tuttu 'ncazzatu  
jittavi a dritta e manca sputazzuna.*

*'Sti casi fatti di cimentu - armatu  
sarannu beddi pi li soi patruna,  
ju li taliu e mi sentu scuncirtatu!*

## COM'UN'ACEDDU

*Com'un'aceddu tornu a lu me niru  
spirannu di truvàrlo ancora 'ntattu  
m'appena arrivu jiettu un gran suspiru  
lu trovu tuttu ruttu, tuttu sfattu.*

*E com'un'acidduzzu volu 'ngiru  
camìnu pì 'sti strati com'un mattu  
a tèniri 'sti lacrimi 'un mi firu  
virennu tuttu chiddu c'hannu fattu.*

*Casi abbattuti, arvuli stuccati,  
unn'hau cchiù chi viriri cull'occhi,  
ma quantu palazzuna fabbricati!*

*Un sacciu pirchè cuntu 'sti 'mprapocchi,  
però mi sentu 'i carni muzzicati  
comu s'avissi cimici e pirocchi!*



## 'U PARAPETTU DDU LUNGOMARI

*Taliu 'stu parapettu sdirrupatu  
lu ferru tuttu tortu e rancitusu  
'stu lungomari è propriu malandatu  
e 'u cori mi lu sentu piatusu.*

*Ju lu ricordu beddu sistimatu  
quann'eru picciutteddu murritusu  
comu 'na zita tannu era addubbatu  
e ora, matri mia, comu è fitusu!*

*'Nzemi a Maria 'nto tempu passatu  
stavu assittatu supra 'stu parapettu,  
ma tannu era lucidu e pittatu . . . .*

*Foddi d'amuri mi la strincìa 'mpettu  
e la vasavu tantu 'nammuratu . . . .  
ma si cci penzu a bianciri mi mettu!*

## 'U MONUMENTU DI PIAZZA MOKARTA

*Stasira 'nta 'sta piazza scummigghiaru  
un monumentu, a diri picca, astrattu,  
ora dumannu, a chiddu chi l'ha fattu,  
sidd'è nn'artista o puru un stazzunaru.*

*'Stu "cosu" nun è 'na testa di sumaru  
e mancu d'un pezzu d'omu è lu ritratu  
annunca, zoccu fici 'stu gran mattu:  
un porcu, un pisci - spata o un calamaru ?*

*Fors'havi 'u ciriveddu ritardatu  
e mischineddu fici 'stu schifiu  
'ntuppannucci tanticchia mutilatu ?*

*Ju vi lu giuru, pi lu veru Diu  
ca sugnu veramenti scuncirtatu,  
. . . anzi mi lanzu siddu lu talù !*

## SULU 'U PUETA CHIANGI

*La terra vugghi comu 'na quarara  
a tutti banni 'mpera 'a stissa crisi  
lu celu bianci mentri nn'arripara  
'sta vota veru mali semu misi.*

*Ogni matina canta la lupara  
li picuruna stannu suttamisi  
cu li soi manu si fannu la bara  
è cunzumatu propriu 'stu paisi.*

*Vulissi diri a tutti li Taliani  
basta cu 'sti morti e cu 'sti lutti,  
finitila di fari li ruffiani.*

*Ma 'u megghiu tira drittu e sinni futti  
comu 'i cunigghia stannu 'nta li tani  
e a mmia m'attocca chiancivi pi tutti!*

## SULU 'U PUETA CHIANGI

*La terra vugghi comu 'na quarara  
a tutti banni 'mpera 'a stissa crisi  
lu celu chianci mentri nn'arripara  
'sta vota veru mali semu misi.*

*Ogni matina canta la lupara  
li picuruna stannu suttamisi  
cu li soi manu si fannu la bara  
è cunzumatu propriu 'stu paisi.*

*Vulissi diri a tutti li Taliani  
basta cu 'sti morti e cu 'sti lutti,  
finitila di fari li ruffiani.*

*Ma 'u megghiu tira drittu e sinni futti  
comu 'i cunigghia stannu 'nta li tani  
e a mmia m'attocca chianciri pi tutti!*

## MI SENTU PERSU

*Supra 'stu munnu ju mi sentu persu,  
'mmiscatu a st'ominicchi senza Diu,  
senz'alma e senza cori, chi schifù,  
di vermi è populatu 'stu universu !*

*Cchiù cercu di truvàri 'u giustu versu  
e cchiù m'accostu e bboni li talù,  
mancàri cchiù mi sentu lu bbulù,  
lu stoccu cchiù s'alligna cchiù è riversu.*

*E si cu 'sti virsuzzi ccà mi lagnu  
jittannu 'sti pinzeri 'nto canali  
di certu un cercu l'orvu pi cumpagnu.*

*Cert'ominicchi su peggìu di l'armali,  
pinzati p'un mumentu a 'stu varagnu:  
simìnu bbeni e po' arricogghiu mali !*

## COMU PASSA LU TEMPU !

*Quann'eru picciutteddu spintuliddu  
jucavu cu l'amici a 'mmucciareddu  
satàvu fratti fratti com'un griddu  
vulavu ccà e ddà comu nn'aceddu.  
Cu lu sinzazzu curtu, picciriddu,  
'stu munnu mi parìa tantu beddu  
cantavu comu canta lu cardiddu,  
ma murritùsu cchiù di lu frinqueddu.*

*Po' vinni 'u tempu d'u primu amuri  
'stu cori jà grapennu la so tuppa  
mangiai pitànzi dd'àutri sapuri  
e navigai cu lu ventu 'npuppa.  
E nun mancàru mancu li duluri,  
lu primu chiàntu cu li primi ruppa,  
'stu munnu stracanciàva di culuri  
lu malutempu prim'o doppu 'ntuppa.*

*E doppu comu vòsi lu Signuri,  
'na casa e 'na famiggia misi 'mperi,  
facennu canuscenza cui suduri  
'nzemmula fui patruni e cammareri.  
Ora, armatu di pascenzia e amuri,  
mantègnu du' figghi e 'na muggghieri  
sfurzannumi di fari 'u bon pasturi  
affunnu 'nta 'stu mari di pinzeri !*

# I N D I C E

	Pag.
INTRODUZIONE . . . . .	3
<i>Il Poeta</i> SALVATORE SUCAMELE . . . . .	” 5
SUNNU VIDDANI ITTATI A LA CAMPIA . . . . .	” 7
ARTE . . . . .	” 11
COMMENTO ALLE POESIE ” MAMMA ” . . . . .	” 13
SICILIA D'AERI E DI ORA . . . . .	” 15
L'OLANDESINA . . . . .	” 17
A NA PUTIARA . . . . .	” 19
ECONOMIA . . . . .	” 21
NASCENNU SFURTUNATI . . . . .	” 23
TRUCCU E PITTURA . . . . .	” 25
A CATERINA M. DI 8 ANNI . . . . .	” 27
U PICURARU DI VALDERICE . . . . .	” 29
LU MATRIMONIU DI ME FIGGHIU MARIU . . . . .	” 31
A LA SIGNURA ACRESTI CRISPINA . . . . .	” 33
LEVANZO . . . . .	” 35
LA SIGNURA MANTUVANA . . . . .	” 37
A NNA PICCIOTTA DI PANTIDDIRIA . . . . .	” 39
LU SEQUESTRU DI LU MORTU . . . . .	” 41
BOTTA E . . . RISPOSTA A ME FIGGHIU DANIELE . . . . .	” 43
PITITTU E SPIRIENZA . . . . .	” 45
COMU TI CHIAMI ? . . . . .	” 47
<i>Il Poeta</i> GUGLIELMO CASTIGLIA . . . . .	” 49
PRIMA SAGRA DEL MELONE DI PACECO (23-8-1980) . . . . .	” 51
LU ZAPPUNI DI ME' NANNU . . . . .	” 55
GIUGNU . . . . .	” 57
E ZAPPU ANCORA . . . . .	” 59
COMU FAZZU ? . . . . .	” 61
ONURI A LA SICILIA . . . . .	” 63
LA ME' LANTERNA . . . . .	” 65
PRIMAVERA DISPITTUSA . . . . .	” 67

SPASIMU D'AMURI . . . . .	Pag. 69
ARMUZZA TURMINTATA . . . . .	” 71
PRIGHIERA DI L'EMIGRANTI . . . . .	” 73
DIFFIRENZA DI SPINI . . . . .	” 75
PI TTIA . . . . .	” 77
COMU PASSU LI JURNATI . . . . .	” 79
E PARIA SANTA . . . . .	” 81
PACECU 'NFESTA (26-11-1964) . . . . .	” 83
VUCCAZZI TINTI . . . . .	” 85
RIALTA' . . . . .	” 87
ORGOGLIO . . . . .	” 89
CHIUSURA . . . . .	” 91
<i>Il Poeta VITO LUMIA</i> . . . . .	” 93
P'A SAGRA D'U MULUNI DI PACECU . . . . .	” 95
LA ME MUSA . . . . .	” 97
LA PUISIA . . . . .	” 99
SUGNU SCANNALIATU . . . . .	” 101
MI SENTU SULU . . . . .	” 103
CANTU D'ACEDDU . . . . .	” 105
NATALI . . . . .	” 107
DISIÙ DI MAZARA . . . . .	” 109
FRATILLANZA . . . . .	” 111
TRI CUSUZZI PI MARIA . . . . .	” 113
UN'UMMIRA . . . . .	” 115
AMARIZZA . . . . .	” 117
STASIRA . . . . .	” 119
VISITANNU MAZARA . . . . .	” 121
COM'UN'ACEDDU . . . . .	” 123
'U PARAPETTU DDU LUNGOMARI . . . . .	” 125
'U MONUMENTU DI PIAZZA MOKARTA . . . . .	” 127
SULU 'U PUETA CHIANSI . . . . .	” 129
MI SENTU PERSU . . . . .	” 131
COMU PASSA LU TEMPU! . . . . .	” 133



**Prezzo L. 4.000**